

AKHBAR : HARIAN METRO

MUKA SURAT : 3

RUANGAN : SETEMPAT

Seremban

HKL siasat dakwaan doktor cuai

Hospital Kuala Lumpur (HKL) menjalankan siasatan berhubung dakwaan bekas pesakit, Akif Hatimi Abdul Halim, 32, mengenai kecuaian doktor yang menjalankan pembedahan ke atasnya, 11 tahun lalu.

Pengarah HKL Dr Heric Corray berkata, pihaknya tidak menerima sebarang aduan secara terus daripada Akif Hatimi sebaliknya diterima melalui pihak mahkamah.

“Pihak kami dihubungi Jabatan Peguam Negara berhubung kes itu (kecuaian) dan kami memberi maklum balas

pada minggu lalu,” katanya ketika dihubungi, semalam.

Terdahulu, Akif Hatimi mendakwa terdapat mata gerudi patah dalam lututnya dipercayai akibat kecuaian doktor yang menjalankan pembedahan memasukkan besi di HKL selepas terbabit kemalangan, pada November 2007.

Bagaimanapun, kata Akif Hatimi, perkara itu hanya diketahui selepas mendapat keputusan sinar-X daripada doktor hospital lain yang mahu menjalankan pembedahan membuang besi di lututnya pada 2015.

AKHBAR : SINAR HARIAN

MUKA SURAT : 35

RUANGAN : FOKUS HARIINI



Dadah dalam ubat perlu ikut dos dibenarkan

KOTA BHARU - Penggunaan dadah dalam perubatan perlu mengikut dos yang ditetapkan oleh pengamal perubatan yang diiktiraf dan berdaftar.

Ketua Penolong Pengarah Kanan Farmasi, Cawangan Amalan dan Perkembangan Farmasi, Jabatan Kesihatan Negeri, Affarizan Sidek berkata, dadah atau 'drug' bukan hanya merujuk kepada heroin, ganja atau pil kuda tetapi sebenarnya terdapat beribu-ribu jenis dadah di seluruh dunia ini yang digunakan oleh lebih kurang 200 juta manusia untuk pelbagai tujuan terutama untuk perobatan.

"Tanpa kita sedari kita mungkin mengambil dadah setiap hari, contohnya kafein dalam air kopi, teh atau coklat adalah sejenis 'drug'. Ubat-ubatan seperti antibiotik dan Paracetamol pula adalah contoh dadah yang digunakan meluas di dalam bidang perubatan.

"Ubat-ubatan mengandungi bahan kimia atau dadah ini dipanggil 'controlled medicine' ataupun ubat terkawal yang mana penggunaannya adalah dikawal oleh doktor. Sebelum ini ia dipanggil 'poison' melalui Akta Racun 1952.

"Ubat terkawal ini hanya boleh dikendalikan oleh doktor perubatan. Malah penjualan oleh ahli farmasi berdaftar hanya melalui preskripsi yang dikeluarkan oleh doktor kecuali ubat terkawal kategori C di bawah Akta Racun 1952," katanya kepada Sinar Harian.

Menurutnya, penyalahgunaan ubat-ubatan yang mengandungi dadah akan memberi pelbagai kesan kepada pesakit, dan sebab itu pesakit perlu ikut arahan doktor contohnya makan empat kali sehari, selama seminggu.

Malah katanya, pelbagai kemungkinan boleh berlaku

apabila kita menggunakan ubatan yang mempunyai dadah secara berlebihan, antaranya boleh menyebabkan gila dan kematian.

"Ketum contohnya adayang keta ia selamat digunakan. Memang betul, zaman dulu orang lama guna ketum untuk perubatan dengan cara yang betul, tapi zaman sekarang ketum digunakan tanpa kawalan sehingga beri kesan kepada pengambilnya.

"Ada pengalaman yang dikongsikan dengan saya, minum ketum boleh tambah tenaga, sama seperti pil kuda dan sebagainya. Namun apabila ia diambil tanpa kawalan, ia memberi kesan kepada kesihatan badan. Ada laporan kematian disebabkan penggunaan ketum di luar negara, adakah kita ingin melihat kematian ini juga berlaku di negara kita?

"Ia bersifat ubat penenang, oleh sebab itu pengambil akan menjadi tenang, lemah dan otak mungkin sedikit lembab. Itu yang berlaku pada mereka yang mengambil tanpa kawalan sehingga menjadikan mereka ketagih," katanya.

Affarizan mengakui, ramai yang tidak mahu mengambil ubat-ubatan yang mempunyai dadah, kònonya kesan kandungan dadah tersebut akan menyebabkan ketidakseimbangan badan kepada pesakit.

Bagaimanapun, beliau menasihati orang ramai untuk mendapatkan nasihat dan patuh pada arahan yang sepatutnya, bukan membuat keputusan sendiri sehingga akhirnya penyakit lain pula timbul.

"Oleh sebab itu, patuh dan makanlah ubat dengan cara yang betul. Tidak kurang, tidak lebih dan jangan ambil ubat sendiri tanpa nasihat doktor yang berdaftar dengan kementerian," katanya.